

NEWSLETTER

OLIMPIJSKOG KOMITETA BIH



No. 27, novembar/decembar 2024



Poštovani sportisti i sportski radnici,
Poštovani prijatelji,

Kao predsjednik Olimpijskog komiteta Bosne i Hercegovine, sa velikim zadovoljstvom vam predstavljam završni newsletter za 2024. godinu.

Ova godina bila je izuzetno važna za Olimpijski komitet Bosne i Hercegovine, sportiste i cijelu olimpijsku zajednicu u našoj zemlji. Nastavili smo proaktivno djelovanje putem kampanje za sistemsko rješavanje finansiranja vrhunskog sporta Bosne i Hercegovine, kao i aktivnosti promocije ideje domaćinstva Olimpijskih igara za mlade YOG 2032. Naša ideja je dobila punu podršku međunarodnih olimpijskih organizacija, a uvjereni smo da će viziju OK BiH podržati i nadležne institucije, te da će Sarajevo i Istočno Sarajevo po treći put obasjati Olimpijski plamen mira, nade, tolerancije i istinskih vrijednosti.

Tokom 2024. godine, naši olimpijci i sportisti su postigli zapažene rezultate na međunarodnim takmičenjima, što je dokaz njihovog truda, posvećenosti i talenta. Naša misija da promoviramo sport i olimpijske vrijednosti nastavila se kroz mnogobrojne programe i projekte koji su za cilj imali podršku olimpijcima, vrhunskim sportistima, savezima, sportskim radnicima, te razvoju i unaprjeđenju sportskog sistema Bosne i Hercegovine.

Protekli period je zalag za buduće aktivnosti koje će Olimpijski komitet BiH inicirati već u januaru mjesecu 2025. godine. Uvjereni smo da će naš rad i zalaganje rezultirati ozbiljnim i svrsishodnim promjenama na opštu dobrobit bh. sporta!

U ime Olimpijske porodice Bosne i Hercegovine zahvaljujem svima na podršci i povjerenju. Radujemo se novim izazovima i prilikama koje nam donosi budućnost. Uživajte u čitanju ovog newsletter-a i budite ponosni na svoje olimpijske i vrhunske sportiste.

Takođe, koristim priliku da cjelokupnoj sportskoj zajednici, te svim građankama i građanima Bosne i Hercegovine pošelim srećnu i uspješnu 2025. godinu!

S poštovanjem,

Akademik prof. dr Izet Rađo
Predsjednik OK BiH

ODRŽANA KONSTITUIRAJUĆA SJEDNICA IZVRŠNOG KOMITETA OK BiH ZA MANDAT 2024-2028



U prostorijama Olimpijskog komiteta BiH održana je prva, Konstituirajuća sjednica Izvršnog komiteta OK BiH u novom mandatom periodu 2024 - 2028. Sjednicom je predsjedavao predsjednik OK BiH akad. prof. dr Izet Rađo, uz prisustvo potpredsjednika Davora Komšića i Vica Zeljkovića, te članova Izvršnog komiteta OK BiH.

Tokom sjednice razmatrani su planovi za unapređenje sportskog sistema, prioriteti i strategije za predstojeći mandat uz opredijeljenost ka promociji olimpijskih vrijednosti i razvoju Olimpijskog pokreta u Bosni i Hercegovini.



XIII IZBOR SPORTISTE GODINE U ORGANIZACIJI OLIMPIJSKOG KOMITETA BOSNE I HERCEGOVINE

Za sportistu 2024. godine, ponovo je proglašena naša najbolja plivačica Lana Pudar!



U svečanom ambijentu multimedijalne sale Olimpijskog komiteta Bosne i Hercegovine i uz direktan TV prijenos na FACE TV, 18. decembra 2024. godine održana je XIII po redu manifestacija "Izbor sportiste godine" u organizaciji Olimpijskog komiteta Bosne i Hercegovine uz specijalno pokroviteljstvo Predsjedništva Bosne i Hercegovine.

Izbor sportiste 2024. godine održan je u prisustvu najeminentnijih lica bh. sportske javnosti.

Lana Pudar: "U svojoj dosadašnjoj karijeri dobila sam mnogo nagrada i priznanja, ali nekako mi je uvijek posebna čast i zadovoljstvo dobiti priznanje od krovne kuće našeg sporta, Olimpijskog komiteta Bosne i Hercegovine. To je institucija koja je uz mene od samih početaka moje karijere i to je zaista nešto što cijenim i što mi puno znači.

Veliko hvala Stručnom žiriju što je prepoznao i vrijednovao moje rezultate iz ove godine.

Ovim putem želim da čestitam i svim ostalim laureatima, mojim sportskim kolegama na njihovim zaslužnim nagradama. Ovo priznanje mi je dodatni motiv da nastavim još bolje i predanije raditi na sebi i da se potrudim da postignem još bolje rezultate u budućnosti!"





Ispred Predsjedništva Bosne i Hercegovine, prisutnima se obratio član Predsjedništva BiH N.J.E. Denis Bećirović koji je između ostalog istakao da je posjetio olimpijski tim na Olimpijskim igrama u Parizu, te da je ugostio i nagradio Olimpijsku i Paraolimpijsku delegaciju nakon Igara, obećavši podršku vrhunskom sportu i u budućnosti.

“U Bosni i Hercegovini trebamo prepoznati pozitivne efekte sporta i sportske diplomatije i stvaranje pozitivnog imidža naše države. Posebno priznanje želim iskazati našim sportistkinjama i sportistima zbog doprinosa i jačanja ambijenta povjerenja i zbližavanja. Prošlost svjedoči da je sport često igrao pozitivnu ulogu u širenju tolerancije, mira, razumijevanja i prijateljstva različitih naroda. Sport je univerzalni fenomen koji nadilazi nacionalne, etničke, vjerske i druge granice.

Svim nagrađenim sportistima čestitam na ostvarenim uspjesima i postignutim rezultatima. To su naši sportski junaci na koje se cijelo društvo može ugledati. Dragi prijatelji, svi zajedno možemo biti ponosni na naše sportistkinje i sportiste. Oni daju snagu i pozitivnu energiju cijeloj državi.”

U ime Olimpijske porodice Bosne i Hercegovine prisutnima se obratio predsjednik OK BiH, akademik prof. dr Izet Rađo:

“Prošla olimpijska godina obilježena je uspješnim nastupima naših pet olimpijaca u Parizu i izborima u Olimpijskom komitetu. Moje kolege, Davor Komšić, Vico Zeljković i moja malenkost, smo postavili ambiciozne planove za nastavak rada OK BiH usmjerene ka Olimpijskim igrama u Los Angelesu 2028. godine.

Olimpijski komitet je realizovao 123 projekta tokom posljednjeg četvorogodišnjeg olimpijskog ciklusa, u vrijednosti 5.600.000 KM, investirajući 70% budžeta u sportiste. Iako smo investirali mnogo u sportski sistem BiH, finansijska podrška države ostaje neophodna za konkurentnost sa evropskim sportskim sistemima. Ostvarena podrška sportskom sistemu BiH je maksimum koji Olimpijski komitet Bosne i Hercegovine kao nebudžetski korisnik može učiniti, ali nedovoljno da ostvarimo ravnopravan status sa ostalim evropskim sportskim sistemima koji imaju izuzetnu i višemilionsku podršku svojih država.

U ovom trenutku država izdvaja samo 1.342.000 KM godišnje za sport, što nije dovoljno za uspješnu pripremu za Los Angeles 2028.



S ponosom ističemo saradnju sa Ministarstvom odbrane i Oružanim snagama Bosne i Hercegovine, što je važan korak ka unapređenju sporta i podršci našim sportistima.

Prioritet OK BiH je definisanje strateških planova za naredni olimpijski ciklus, uključujući jasno određivanje kategorija sportista koje ćemo podržati. Mi ćemo nastaviti sa programskim aktivnostima, ali za ostvarenje naših zajedničkih ciljeva potrebna nam je minimalna godišnja podrška države od 5 miliona KM za realizaciju programa podrške sportistima-olimpijcima.

Dakle, Olimpijski komitet BiH nastavlja ulagati u sport i infrastrukturu kroz domaće i međunarodne projekte, ali država mora prepoznati značaj dodatnog finansiranja za razvoj sporta i promociju Bosne i Hercegovine na međunarodnoj sceni.

Uz ponos na postignuća, radimo na budućnosti. Posebno ističemo međunarodnu podršku za kandidaturu Sarajeva i Istočnog Sarajeva za Zimske olimpijske igre mladih 2032. Očekujemo istu podršku ovom projektu od nadležnih BiH ministarstava i institucija.

Odlukom Skupštine OK BiH je sa ponosom promovisao Marijana Kvesića, Milanka Mučibabića i posthumno Sinišu Kisića u počasne predsjednike OK BiH za njihov nemjerljiv doprinos razvoju sporta.

Hvala svima koji podržavaju naše sportiste. Nastavimo zajedno stvarati budućnost bosanskohercegovačkog sporta!"

Kompletnu listu dobitnika nagrada pogledajte na [OVOM LINKU](#).



PROMOCIJA SPORTA MEĐU VOJNICIMA: OLIMPIJSKI DUH U ORUŽANIM SNAGAMA BOSNE I HERCEGOVINE



Tokom novembra i decembra, bh. olimpijci i vrhunski sportisti su učestvovali u aktivnostima promocije sporta u organizaciji Oružanih snaga BiH. Olimpijski komitet Bosne i Hercegovine već deset godina predano radi na projektu zapošljavanja vrhunskih sportista u Oružanim snagama BiH, a realizacija ove ideje sada je sve bliža ostvarenju.

Tokom posjete vojnim bazama, bh. olimpijci i vrhunski sportisti Amel Tuka, Mesud Pezer, Elvedina Muzaferija i Lejla Njemčević vojnicima su prenijeli duh olimpijskih vrijednosti, prijateljstva, poštovanja, fair playa i izvrsnosti. Učesnici su s velikim interesovanjem pratili aktivnosti, ističući koliko ovakvi susreti unose novu energiju u svakodnevni vojni život i inspirišu implementaciju olimpijskih vrijednosti i bavljenje sportom.

„Prilika da se sretnemo s vrhunskim sportistima donosi ne samo inspiraciju, već i jača timski duh unutar naših jedinica,“ istakao je jedan od oficira u Rajlovcu.

Olimpijski komitet BiH ostaje posvećen značaju promocije sporta među vojnicima i naglašava važnost sinergije između sporta i Oružanih snaga. Projekti poput ovoga predstavljaju jedinstvenu priliku za povezivanje zajednica i podizanje svijesti o značaju sporta kao univerzalne vrijednosti.



MINISTAR HELEZ UPRILOČIO PRIJEM VRHUNSKIM SPORTISTIMA I PREDSTAVNICIMA OLIMPIJSKOG KOMITETA BiH

Zamjenik predsjedavajuće Vijeća ministara Bosne i Hercegovine i ministar odbrane BiH Zukan Helez sa zamjenikom Slavenom Galićem, upriličio je svečani prijem vrhunskim sportistima BiH i predstavnicima Olimpijskog komiteta BiH u Domu Oružanih snaga BiH.

Prijem je upriličen povodom uspješnog realizovanja aktivnosti obilaska vojnih lokacija Oružanih snaga BiH. Ministar Helez je u uvodnom obraćanju pozdravio prisutne, kazavši da mu je zadovoljstvo što je domaćin prijema koji je organizovan u čast vrhunskih sportista, olimpijaca Bosne i Hercegovine.

„U Ministarstvu odbrane BiH radimo na novom Pravilniku koji će omogućiti vrhunskim sportistima naše zemlje da postanu dio Oružanih snaga BiH. Na ovaj način ćemo okupiti mlade i perspektivne sportiste u Oružane snage BiH kako bismo promovisali naše Oružane snage kao instituciju, ali i državu Bosnu i Hercegovinu na međunarodnom planu, a sportistima pomogli da riješe radno pravni status, te imaju bolje uslove za obuke, pripreme i sama sportska takmičenja“, kazao je Helez.

Predsjednik Olimpijskog komiteta BiH, akademik prof. dr Izet Rađo naglasio je da Ministarstvo odbrane BiH radi veliku stvar kada su u pitanju vrhunski sportisti u našoj zemlji.

Također, kazao je da Oružane snage BiH na ovaj način rade što i oružane snage u svijetu. Tekst: [OS BiH](#)



GOSTOVANJE PREDSDJEDNIKA OK BIH AKADEMIKA PROF. DR RAĐO IZETA NA FACE TV, POVODOM DANA DRŽAVNOSTI BOSNE I HERCEGOVINE



Predsjednik Olimpijskog komiteta Bosne i Hercegovine akademik prof. dr Izet Rađo gostovao je u emisiji “Uzbuđenje” na FACE TV povodom Dana državnosti Bosne i Hercegovine. Razgovor na teme od značaja za sport i bh. društvo možete pogledati na linku [OVDJE](#) ili klikom na fotografiju.

GOSTOVANJE DOC. DR DEJANE PLANINČIĆ VIŠEG STRUČNOG SARADNIKA ZA SPORT, MEĐUNARODNE ODNOSI I PROJEKTE OK BIH, POVODOM IZDAVANJA KAPITALNOG DJELA “EVALUACIJA OLIMPIJSKOG SPORTSKOG SISTEMA BIH”



Viši stručni saradnik za sport, međunarodne odnose i projekte OK BiH, doc. dr Dejana Planinčić gostovala je na FACE TV povodom izdavanja kapitalnog djela “Evaluacija olimpijskog sportskog sistema BiH” autora akad. prof. dr Rađo Izeta, doc. dr Planinčić Dejana i doc. dr Fazlagić Saida. Emisiju možete pogledati na linku [OVDJE](#).

NASTAVLJENA DUGOGODIŠNJA SARADNJA OK BIH I LUTRIJE BIH KOJA IZ VIŠEGODIŠNJE PRELAZI U VIŠEDECENIJSKU



Lutrija BiH, predvođena direktorom Edhemom Pašukanom, je potpisom novog jednogodišnjeg Ugovora još jednom potvrdila da cijeni sport i vrhunska sportska dostignuća. Na ovaj način Lutrija Bosne i Hercegovine je demonstrirala društvenu odgovornost kroz implementaciju olimpijskih vrijednosti poštovanja i izvrsnosti u poslovanju, planiranju i investiranju.

OK BiH je zahvalan društveno odgovornim kompanijama na

partnerstvu uz konstataciju da su cjelokupna sponzorska sredstva ostvarena u prošloj i ovoj godini u OK BiH, uplaćena vrhunskim sportistima i olimpijcima kroz Program+ i druge projekte podrške najboljima od najboljih.

POČASNI PREDSJEDNIK OK BIH UČESTVOVAO NA PANEL DISKUSIJI O OLIMPIJSKIM I PARAOLIMPIJSKIM VRIJEDNOSTIMA

Počasni predsjednik Olimpijskog komiteta Bosne i Hercegovine, prof. dr Milanko Mučibabić, prisustvovao je panel diskusiji na temu olimpijskih i paraolimpijskih vrijednosti. Događaj je organizovala Ambasada Francuske u Bosni i Hercegovini u saradnji s organizacijom UN Women.



Panel diskusija održana je u Muzeju savremene umjetnosti Republike Srpske u Banjoj Luci i okupila je značajne učesnike i stručnjake koji su razgovarali o važnosti promovisanja jednakosti, inkluzije i univerzalnih vrijednosti kroz sport.

Počasni Predsjednik OK BiH je pozdravio prisutne u ime Predsjedništva OK BiH prof. dr Izeta Rađe i potpredsjednika OK BiH Davora Komšića i Vica Zeljkovića, te istakao važnost dijaloga na temu olimpijskih i paraolimpijskih vrijednosti koje služe kao temeljne

smjernice za pozitivne društvene promjene, kako u sportu, tako i izvan njega.

Ovaj događaj predstavlja još jedan korak u pravcu jačanja svijesti o važnosti sporta kao sredstva za društvene promjene i povezivanje zajednica.

OLIMPIJSKI KOMITET BiH I OVE GODINE OBRADOVAO NAJMLAĐE NOVOGODIŠNJIM PAKETIĆIMA U JABLANICI, PALAMA I KREŠEVU



Olimpijski komitet BiH nastavlja svoju plemenitu misiju, obradovavši mališane novogodišnjim paketićima u okviru svoje godišnje humanitarne akcije. Ove godine, ukupno 154 paketića podijeljeno je djeci iz područja pogođenih nedavnim poplavama u Jablanici, zatim djeci sa Pala i Kreševa, čime je održana dugogodišnja tradicija organizacije ovih aktivnosti.

Prva dodjela paketića održana je u Jablanici, gdje su mališani iz Osnovne škole Suljo Čilić primili poklone iz ruku predsjednika OK BiH, akademika prof. dr Izet Rađe i generalnog sekretara doc. dr Saida Fazlagića. Ovoj humanitarnoj misiji pridružio se i profesor dr Zoran Milošević iz Novog Sada, koji je uručio dva laptopa, donirajući ih direktoru Cemić Adisu za potrebe škole.

Druga dodjela paketića upriličena je u Kulturnom centru Pale, gdje je paketiće mališanima uručila Tanja Karišik Košarac, trostruka olimpijka i članica Izvršnog komiteta OK BiH.

Za završetak godine, paketići su dodijeljeni i članovima Udruge mladih sportaša "Univerzalna sportska škola Sparta" u Srednjoškolskom centru "Kreševo". Paketiće su uručili potpredsjednik OK BiH Davor Komšić i generalni sekretar OK BiH doc. dr Said Fazlagić.

Olimpijski komitet Bosne i Hercegovine je posebno ponosan na ovu tradiciju i ističe zadovoljstvo što može uveseljavati najmlađe. Nastavićemo s dodjelom novogodišnjih paketića, uvjereni da su dječija sreća i osmijeh najveća nagrada koja se može dobiti.



ODRŽANA PROMOCIJA DOKUMENTARNOG FILMA “LIGURE SA TREBEVIĆA”



U multimedijalnoj sali Olimpijskog komiteta Bosne i Hercegovine, u četvrtak, 26. decembra održana je zatvorena projekcija dokumentarnog filma *Ligure sa Trebevića* autora Nihada Ušanovića.

Film je producirala Al Jazeera Balkans uz podršku Olimpijskog komiteta BiH i Sankaškog saveza BiH, dok je izvršnu produkciju realizirao Triangle Studio.

Dokumentarni film *Ligure sa Trebevića* zamišljen je da, kroz prizmu bivših istaknutih bh. olimpijaca u bobu i sankanju, od 1984. godine do danas, doprinese razvoju pozitivne medijske slike u svim društvenim sferama o potrebi rekonstrukcije bob i sankaske staze na Trebeviću.

Promocija je bila izuzetno emotivna jer je kroz retrospektivu vratila prisutne u period najsvjetlije istorije Bosne i Hercegovine, period Zimskih olimpijskih igara Sarajevo 1984, ali i nastupa sankasa i bobista pod zastavom BiH, kao i mladih naraštaja koji tek uče prve tehnike u sankasnom sportu.

U filmu su učestvovali legendarni bobisti i sankasi kao što su Zdravko Stojnić, Senad Omanović, Igor Špirić, Nizar Zaćiragić, Mario Franjić, Zoran i Ognjen Sokolović, Edin Krupalija, Nihad Memeledžija, Ismar Biogradlić, Mirza Nikolajev i mlade nade bh. sankanja Ena Karišik, Arijan Ademović, Belma Dizdarević i Tarik Kaknjašević.

U filmu je učestvovala i prof. dr Sanela Klarić koja je detaljno prezentirala istoriju izgradnje bob staze, ali i mogućnost efikasne rekonstrukcije. Na kraju svoj izlaganja je zamolila sve pristune da daju svoj doprinos da se bob staza rekonstruiše, jer ona predstavlja puno više od običnog sportskog objekta.

Nakon projekcije filma održana je Q&A sesija, u kojoj su protagonisti filma odgovarali na pitanja o važnosti rekonstrukcije bob staze i o tome kakav bi utjecaj ta odluka mogla imati u sportskom smislu, kako za ovu regiju, tako i šire.

Javno emitovanje filma će biti početkom januara 2025. godine na Al Jazeera Balkans nakon čega će dokumentarni film biti dostupan za javnost.

Tekst djelimično preuzet sa [Radio Sarajevo](https://www.radio-sarajevo.ba).

SPORTSKI SAVEZI BOSNE I HERCEGOVINE

TENISKI SAVEZ BIH | ODRŽANA TENISKA TRENERSKA KONFERENCIJA



U Sarajevu je 23. i 24. novembra 2024. godine održana teniska Trenerska konferencija u organizaciji Teniskog saveza BiH. Gosti/predavači na Konferenciji bili su g. Vitor Cabral (direktor razvojnog ITF odjela), g. Goran Shevchenko (ITF ekspert), te g. Kenan Maličbegović (ITF tutor).

Konferencija teniskih trenera organizovana je u sklopu projekta "Development of National Sports System" koji je u 2024. godini realizovan uz podršku Internacionalne teniske federacije (ITF), Olimpijske Solidarnosti, te Olimpijskog komiteta BiH.

Na Konferenciji teniskih trenera prisustvovalo je oko pedeset trenera iz cijele Bosne i Hercegovine, koji su nakon vrhunskih prezentacija predavača imali priliku naučiti nove vještine teniskog sporta, koje koristi Internacionalna Teniska Federacija.



DŽUDO SAVEZ BIH | PROF. DR BRANISLAV CRNOGORAC IZABRAN U IZVRŠNI KOMITET EVROPSKE DŽUDO UNIJE NA POZICIJU DIREKTORA



Na 76. Kongresu Evropske džudo unije (EJU) odabran je novi Izvršni komitet EJU na kojem je proslavljeni bh. trener i istaknuti sportski radnik, prof. dr. Branislav Crnogorac izabran na funkciju direktora za razvoj.

Ova funkcija je nova potvrda cijenjenosti dugogodišnje posvećenosti razvoju džudo sporta u Bosni i Hercegovini, rada prof. dr Crnogorca, ali i rada Džudo saveza Bosne i Hercegovine.

“Ova pozicija u krovnoj Evropskoj džudo kući prčinjava mi veliku čast i zadovoljstvo. Ovo je iznimno veliko priznanje za moje dugo sportsko putovanje. Mislim da nije pretenciozno da kažem da je ovo ujedno i velika čast za džudo sport i sport BiH općenito. Neko je rekao “Ako želite hodati brzo, hodajte sami, ako želite hodati daleko, hodajte skupa”. Stigao sam daleko jer sam hodio skupa sa mojim sportistima i saradnicima. Stoga veliko hvala mojoj obitelji, mojim sportistima, saradnicima i svima koji su me hrabрили na mom dugom sportskom putovanju. Posebno hvala ljudima koji su mi ukazali povjerenje, liderima evropskog i svjetskog sportskog pokreta, gospodi, Laszlu Toth predsjedniku EJU i Marius Vizeru predsjedniku IJF”, istakao je prof. dr Crnogorac.

Ovo je svakako još jedno veliko priznanje za cjeloživotni rad, velika čast za džudo sport i sport u Bosni i Hercegovini općenito.



DŽUDO SAVEZ BOSNE I HERCEGOVINE BOGATIJI ZA SUDIJU SA INTERKONTINETALNOM LICENCOM



Od nedavno je Džudo savez Bosne i Hercegovine bogatiji za jednog sudiju sa interkontinentalnom licencom, a nju je na IJF polaganju u Dakaru (Senegal) u periodu od 17. do 22. novembra ove godine stekao Mladen Vuković.

Nekadašnji džudista i reprezentativac Bosne i Hercegovine je pred komisijom uspješno položio test i to kao jedan od najboljih polaznika. To potvrđuje dopis koji je na adresu Džudo saveza stigao iz Svjetske džudo federacije (IJF).

“Prestižan uspjeh ostvario je zahvaljujući njegovom iskustvu, kompetentnosti, želji i volji koju je demonstrirao za razvoj suđenja u vašem savezu ali i u Evropskoj džudo uniji”, navodi se u pismu koje je IJF adresirao na predsjednika Saveza Ognjena Pavlovića. Vuković je bio među najboljim kandidatima, a od njih ukupno 42 čak 16 nije uspjelo položiti ispit za interkontinentalnu A licencu.

Naš arbitar postao je tek treći vlasnik interkontinentalne A licence iz Bosne i Hercegovine. Prije njega ovo zvanje stekli su samo Siniša Đukić i Branislav Crnogorac, koji odavno nije aktivan sudija.

Mladen Vuković je i član Generalne skupštine OK BiH i Suda časti i sportske arbitraže OK BiH.



TAEKWONDO SAVEZ BIH | EVROPSKO SENIORSKO U21 TAEKWONDO PRVENSTVO



Od 21. do 23. novembra, Sarajevo je ugostilo Evropsko seniorsko U21 taekwondo prvenstvo. Veliki broj zvanica iz kulturnog i javnog života, prisustvovalo je svečanom otvorenju takmičenja na kojem je nastupilo više od 560 takmičara iz 43 zemlje, a direktan TV prijenos realizovala je TV SA.

Kontinentalni šampionat otvorenim je proglasio potpredsjednik Olimpijskog komiteta Bosne i Hercegovine Davor Komšić, te gostima poželio toplu dobrodošlicu.

Član Predsjedništva Taekwondo saveza Bosne i Hercegovine i prvi čovjek Taekwondo saveza Federacije BiH, Samir Šarić se posebno zahvalio Evropskoj taekwondo federaciji na ukazanom povjerenju. Kao tehnički organizator Šarić je uručio plakete i zahvalnice saradnicima i potpredsjedniku Olimpijskog komiteta BiH Davoru Komšiću.

Pored 567 takmičara na prestižno takmičenje u prijestolnicu BiH stigla su i 223 dužnosnika. Ceremoniju svečanog otvorenja uveličao je Kukkiwon Demo team iz Koreje, a specijalni gosti kroz atraktivne i spektakularne poteze prikazali su svu ljepotu taekwondoa.

Detaljnije na [OVOM LINKU](#).



OTVOREN PRVI NACIONALNI TAEKWONDO TRENING CENTAR U BOSNI I HERCEGOVINI



U sklopu Europskog taekwondo prvenstva za sportiste do 21 godine, u Livnu je svečano otvoren prvi nacionalni trening centar za taekwondo u Bosni i Hercegovini. Ovo je jedan od dva centra čija je izgradnja planirana u našoj zemlji, a sufinansiran je od strane Vlade Republike Koreje.

Pored predstavnika Taekwondo saveza BiH u svojstvu domaćina, svečanosti otvaranja prisustvovala su brojne međunarodne ugledne zvanice, uključujući ambasadora Republike Koreje Nj.E. Hong Sungwooka, potpredsjednika Europske taekwondo federacije Šahina Metina, predstavnika Svjetske taekwondo federacije Usmana Dildara, te predstavnika Kukkiwona Kabkila Jeona.

Čestitamo Taekwondo savezu BiH na ovom značajnom infrastrukturnom ostvarenju, a sportistima želimo mnogo uspjeha u budućim nastupima koristeći upravo ove novoizgrađene trenažne kapacite.

SAMIR ŠARIĆ IMENOVAN U IZVRŠNI ODBOR EVROPSKE TAEKWONDO UNIJE, PRIZNANJE ZA PREDAN RAD



Predsjednik Taekwondo saveza Federacije Bosne i Hercegovine i član Predsjedništva Taekwondo saveza Bosne i Hercegovine, Samir Šarić, imenovan je za člana Izvršnog odbora Evropske taekwondo unije.

Odluku o imenovanju i veliko priznanje za predan rad i doprinos razvoju taekwondo sporta u našoj zemlji potpisao je predsjednik ETU-a, Sakis Pragalos. Prvi čovjek Evropske taekwondo unije bio je posebno oduševljen činjenicom da se u Bosni i Hercegovini predano radi na izgradnji infrastrukture za potrebe taekwondoa.

Šarić je nedavno u Atini održao nekoliko sastanaka s predsjednikom Evropske taekwondo unije, a tu priliku je iskoristio i da mu predoči sav progres koji je taekwondo ostvario u Bosni i Hercegovini, kao i planove za budućnost.

USPJEŠNO ODRŽAN DVODNEVNI SEMINAR TAEKWONDO SAVEZA BIH



U Sarajevu, 21. i 22. decembra, održan je Licencirani seminar za WT 2025, organizovan od strane Taekwondo saveza Bosne i Hercegovine. Nakon uvodnih riječi članova Izvršnog odbora, gosti su raspravljali o važnim sportskim temama, uključujući predavanje prof. dr. Almir Maljevića o funkcionalnom treningu. Maljević je istakao potrebu za podizanjem standarda pripreme sportista kako bi se postigao olimpijski uspjeh.

Dekan Pedagoškog fakulteta, dr. Daniel Maleč, govorio je o primijenjenoj psihologiji u taekwondo takmičenjima, dok je Danijel Bursać na kraju prvog dana predstavio teme Parataekwondo i Prva pomoć, uključujući projekat o unapređenju paraolimpijskog taekwondo sporta uz podršku Ministarstva obrazovanja Kantona Sarajevo.

Seminar je obuhvatao i praktični rad za sudije, uz prezentaciju međunarodnog arbitra Belmira Berberovića i diskusije o sudijskim pravilima koje je vodio Anđelko Vučenik (8. DAN).

POMOĆ ZA STRADALE U POPLAVAMA, VIŠE OD 15.000 KM PRIKUPLJENO ZA ČLANOVE TAEKWONDO KLUBA FOJNICA

Taekwondo savez Bosne i Hercegovine i Taekwondo savez Federacije Bosne i Hercegovine 9. oktobra 2024. godine pokrenuli su akciju za pomoć svojim članovima koji su stradali u poplavama.

Akciju državnog i federalnog saveza podržali su i brojni bh. taekwondo klubovi, a deset dana nakon pokretanja akcije (19. 10. 2024.) u Livnu je održan turnir humanitarnog karaktera. Sva prikupljena sredstva uručena su članovima Taekwondo kluba Fojnica koji su pogođeni nedavnim teškim poplavama u našoj zemlji.



Domaći taekwondo klubovi, predvođeni savezima, i ovoga puta pokazali su jedinstvo i humanost onda kada je to bilo najpotrebnije, a akciju je podržao i Taekwondo klub Zadar iz Hrvatske.

“Još jednom zahvaljujemo savezima i klubovima koji su donirali sredstva za naše članove, novac ćemo podijeliti u narednom periodu gdje ćemo također podnijeti izvještaj”, poručili su iz Taekwondo kluba Fojnica.

ATLETSKI SAVEZ BIH | OLIMPIJAC AMEL TUKA POMAŽE KLUBOVIMA U PROMOCIJI DJEČJE ATLETIKE



Posjeta olimpijca Amela Tuke, bila je vrhunac dana za više od 300 djece iz 18 škola i sedam klubova koji su učestvovali na atletskom mitingu u dvorani u sarajevskoj Olimpijskoj dvorani Juan Antonio Samaranch, 18. decembra.

Tuka, dvostruki olimpijac, Predsjednik Komisije olimpijaca OK BiH i osvajač srebrne medalje na Svjetskom prvenstvu u atletici 2019. na 800 metara, navijao je za takmičare i fotografisao se s nastavnicima i učenicima iz svake od škola kako bi pokazao svoju podršku događaju koji je imao za cilj potaknuti mlade da se pridruže lokalnim atletskim klubovima i integrišu Program dječije atletike u nastavni plan i program svojih škola.

“Zaista sam uživao u danu i volim da navijam za mlade sportiste i naš sport kad god mogu”, rekao je Tuka, koji je uzeo pauzu od zimskih priprema za sezonu 2025. kako bi bio prisutan na događaju. “Ovakvi događaji mogu biti odlična motivacija i pomoći djeci da nauče da vole naš sport.”

“Amel je divan uzor mladima i ima pravu zvjezdanu moć. Kada je ušao u dvoranu, okupili su se oko njega i mogli ste vidjeti kako su im se lica ozarila kad im je rekao da imaju potencijal da budu još bolji od njega zato što su se atletikom počeli baviti u mlađem uzrastu od njega”, rekao je generalni sekretar ASBiH Mehmed Lokmić.

Ovaj događaj koji je organizovao Atletski klub Novi Grad Sarajevo je bio ključna tačka u realizaciji nacionalnog projekta povećanja učešća mladih u atletici i jačanju sportskih klubova, kojeg pod nazivom Razvoj klubova kroz dječiju atletiku vodi Atletski savez Bosne i Hercegovine (ASBiH).

Finansiran grantovima Svjetske atletike i Evropske atletike, isti događaj u zatvorenom prostoru za više od 200 mladih organizovao je AK Borac u Banjoj Luci.

Projektom je obezbjeđena atletska oprema za aktivnosti djece i sredstva za profesionalnu obuku vođa projekta u klubovima za izradu njihovih poslovnih planova u 2025. Objašnjavajući da su zabava i unapređenje opće kondicije, kao što je naglašeno u programu Dječije atletike glavni prioritet, Lokmić je rekao da trenutno radi s pet odabranih klubova i da se nada da će ostali u cijeloj zemlji prilagoditi svoje programe i blisko surađivati s lokalnim školama kako bi doveli više male djece u atletiku u narednoj godini.

“Ukoliko mladi sportisti uživaju u iskustvu sa ovog događaja, vjerovatno će duže ostati u sportu i ostvariti više koristi koje sport pruža, što je najvažnija poruka našeg projekta. I ko zna, ako se zadrže dovoljno dugo u našem sportu, imat ćemo veće šanse da pronađemo našu sljedeću zvijezdu.”

ATLETSKI SAVEZ BIH | AK BORAC UVODI DJEČIJU ATLETIKU U ŠKOLE



Luka Ivičić, atletičar, aktuelni rekorder BiH u višeboju i student Ekonomskog fakulteta u Banjoj Luci, upoznao je više od 260 školske djece sa atletikom u okviru projekta za povećanje članstva AK Borac i jačanje sporta u zemlji.

Kao jedan od voditelja klupskih projekata, Ivičić je posjetio časove fizičkog vaspitanja u banjalučkim školama, predstavljajući Dječji atletski program Svjetske atletike.

Na promocijama održanim 16. i 18. decembra, više od 100 dece se takmičilo u zabavnim disciplinama trčanja, skakanja i bacanja. Ivičić je naglasio važnost dobre zabave i primjene aktivnosti atletike tokom školskih časova kako bi se stvorila generacija koja cijeni ovaj sport.

Njegov rad dio je šireg projekta ASBiH, koji uključuje slične promotivne događaje za više od 300 djece u Sarajevu, nabavku atletske opreme i stručnu obuku za klubove. Luka planira da uvede atletiku u više banjalučkih škola i organizuje veće događaje na otvorenom u proljeće.

Objašnjavajući da mu je glavni cilj da se svi dobro provedu i vide da atletika može biti zanimljiva i interesantna, Ivičić je rekao da dosadašnji uspjeh duguje tome što može raditi sa školskim nastavnicima koji razumiju potencijal dječije atletike i pomažu u razvoju fizičkih vještina i promoviraju kondicije.

“Važno je da nastavnici vide kako mogu primijeniti aktivnosti i filozofiju dječije atletike u nastavi tokom cijele godine i to će pomoći da se stvori generacija koja zaista cijeni naš sport. Nakon odrađenog online kursa i mojih praktičnih instrukcija bilo je sjajno što im ASBiH može dodijeliti certifikate Svjetske atletike kao učesnicima dječije atletike.”

Ivičićev rad dio je šireg projekta ASBiH podržanog grantovima Svjetske atletike i Evropske atletike koji uključuje sličan promotivni događaj za više od 300 djece prošle u Sarajevu, nabavku atletske opreme za dječije aktivnosti i stručnu obuku za pomoć klubovima za razvoj njihovih poslovnih planova za 2025.

“Luka je prihvatio naš projekat i impresionirani smo kako je pomogao AK Borac da razvije kvalitetan program za mlađe uzraste koji je sada u funkciji. Njegovi naporu su dobar primjer za druge klubove kako možemo razviti korijene našeg sporta u cijeloj državi”, izjavio je generalni sekretar ASBiH Mehmed Lokmić.

GOLF SAVEZ BOSNE I HERCEGOVINE NAJAVLJUJE POSJETU TOP 50 GOLF TRENERA U VELIKOJ BRITANJI



U martu 2025. Bosnu i Hercegovinu će posjetiti Trey Niven, PGA profesionalac, renomirani golf trener i content kreator, poznat po svom jedinstvenom pristupu treningu koji spaja stručnost, inovativnost i strast prema golfu. Trey je razvio svoje metode tokom godina rada i učenja od vodećih svjetskih trenera, čineći ih jednostavnim, efikasnim i prilagođenim igračima svih nivoa – od početnika koji tek ulaze u svijet golfa, do naprednih igrača i trenera koji žele usavršiti svoju tehniku i znanje. Ovaj

pristup donio mu je prestižno priznanje kao jednog od Top 50 golf trenera u Velikoj Britaniji, prema magazinu GolfMonthly. Trey redovno gostuje i na Sky Sportsu, gdje je analizira PGA i LPGA turnire.

Kao stručnjak iz kompanije Foresight Sports, on koristi vrhunsku Foresight Sports launch monitor tehnologiju i visoko-brzinske kamere za detaljnu analizu svakog aspekta igre. Ova napredna tehnologija omogućava mu precizno identifikovanje snaga i slabosti igrača, uz kreiranje planova treninga koji se temelje na statističkoj analizi i testovima vještina.

Trey Niven će biti voditelj Golf Simulator Trening Vikenda "18 RUPA U ZNANJU!", koji će se održati od 14. do 16. marta 2025. u Hotelu Nomad na Bjelašnici. Bez obzira da li ste početnik koji želi savladati osnove golfa,iskusni igrač koji cilja na profesionalnu karijeru ili trener koji želi unaprijediti svoje metode, Trey Niven će vam pružiti prilagođeno iskustvo koje će transformisati vašu igru.

SAVEZ DIZAČA TEGOVA BIH | KUP PRVAKA I REKORDERA BIH



Povodom Dana Državnosti Bosne i Hercegovine u Sarajevu je održan Kup Prvaka i Rekordera BIH i memorijal „Andrija Maleč“.

Nastupilo je 18 najboljih takmičara i takmičarki, odnosno prvaci i rekorderi Bosne i Hercegovine. Uz nekoliko oborenih BiH rekorda, održano je jedno zanimljivo takmičenje.

Također je izvršeno proglašenje pobjednika ekipnog prvenstva BIH, kako u mješovitoj, tako i u muškoj i u ženskoj konkurenciji.

Rezultate takmičenja, odnosno listu pobjednika po starosnim i funkcijskim grupama možete pogledati na [OVOM LINKU](#).

PROMOCIJA STREET CURLING-A

Karling savez BiH u okviru projekta „Karling za sve 2024“ organizovao je promociju Street curling-a u Osnovnoj školi „Pale“, Istočno Sarajevo.

“Cilj je bio okupiti učenike III, IV i V razreda osnovne škole i članove Udruženja za pomoć djeci i omladini sa posebnim potrebama „Sunce“. Do sada je preko 90 učenika i članova Udruženja učestvovalo u promociji. Mnogo nas raduje što su djeca sa velikim oduševljenjem prihvatili pravila i način igre ovog sporta”, izjavili su iz Karling saveza BiH.

Street Curling je nastao iz karling sporta na ledu i odličan je način učenja karlinga u nedostatku leda. Pravila Street Curlinga imaju mnogo sličnosti sa pravilima karlinga na ledu, koristeći tehnike i strategije koje odražavaju igru na ledu. Street Curling zahtijeva samo tvrdu, ravnu površinu za igru. Nije potrebno prethodno iskustvo u verziji ovog sporta i pogodan je za ljude različitih uzrasta i sposobnosti. Street Curling se može igrati kao sport mješovitih sposobnosti.



SAVEZ DIZAČA TEGOVA BIH | NASTUP NA SVJETSKOM PRVENSTVU



BIH takmičar Dino Smajić je na Svjetskom prvenstvu postavio novi Apsolutni seniorski rekord BIH u trzaju, 143 kg, te rekorde u izbačaju 166 kg, a u biatlonu 309 kg.

Dino je zauzeo 19. mjesto i pobijedio 5 takmičara, od kojih su neki osvajači svjetskih medalja.

Ogromnu bitku imao je sa litvanskim takmičarem Neilasom Guinekusom kojeg je pobijedio za 1 kg u izbačaju.

RAGBI SAVEZ BIH | AKTUELNOSTI



Ragbi savez BiH je u suradnji sa Filozofskim fakultetom Univerziteta u Zenici, Odsjekom za tjelesni odgoj i sport održao sastanak sa predstavnicima Fakulteta za tjelesni odgoj i sport iz Bosne i Hercegovine kao dio aktivnosti u okviru početka projekta T1 Ragbija u BiH.

Sastanku su prisustvovali predstavnici fakulteta sporta i tjelesnog odgoja iz Tuzle, Mostara, Sarajeva i Istočnog Sarajeva, gdje se nakon uvodnog obraćanja potpredsjednika Ragbi Saveza BiH doc. dr sc. Mirze Oruča predstavio projekat i koncepcija razvoja T1 ragbija sa aspektom razvoja ženskog ragbi sporta u BiH.

Realizacija osmogodišnjeg razvojnog programa trebala bi rezultirati i formiranjem klubova te učešćem ženske bh. ragbi selekcije na nekom velikom takmičenju u ragbiju 7.

U sklopu implementacije T1 Univerzitetskog ženskog ragbija u narednih nekoliko mjeseci, Ragbi savez BiH sa svojim partnerima planira početi sa aktivnostima na formiranju ragbi sekcija ženskih timova na fakultetima u BiH. Cilj je da se oformi i studentsko takmičenje, ali prijesvega da se uvedu stručni kadrovi i izvrši popularizacija ovog sporta kod studenata, a nakon toga i kod osnovaca i srednjoškolaca.

Pored predstavnika Ragbi Saveza BiH prisustvovali su i predstavnici Filozofskog fakulteta UNZE prof. dr sc. Aleksa Stanković i dekanesa prof. dr sc. Alica Arnaut. Tokom izjave za medije prof. dr sc. Aleksandar Stanković, šef Studijskog programa Tjelesnog odgoja i sporta Filozofskog fakulteta Univerziteta u Zenici izjavio je: "Glavni je cilj OI 2032. godine, na kojima želimo imati našu ragbi selekciju u ragbiju 7. Imamo osam godina za pripremu."

Prisutni predstavnici Fakulteta tjelesnog odgoja i sporta su tokom diskusije izrazili podršku i spremnost u implementaciji ovog projekta, a samim tim i učešće u aktivnostima. Svakako pored planiranja suradnje u stručnom pogledu planirana je i jedna zajednička aplikacija na Erasmus+ programe kao i druge vidove sufinansiranja projekata.

Ovaj projekat je podržala i Svjetska Ragbi organizacija World Rugby.

CHEERLEADING SAVEZ BIH | AKTUELNOSTI



Cheerleading klubovi Let's Dance Nevesinje i We Dance Gacko sudjelovali su na Otvorenom prvenstvu Trofej Voždovca u Beogradu. Sportašice iz Nevesinja osvojile su ukupno 4 zlatne medalje i jednu srebrnu medalju, a sportašice iz Gacka jednu brončanu medalju. U sklopu ovog natjecanja održano je i kolo Europske Lige ECL na kojoj su sportašice Nevesinja Aleksandra Vučković i Tamara Lojpur u duo disciplini u juniorskom uzrastu osvojile 8 mjesto.

U mađarskom Đeru održano je kolo Europske Lige ECL gdje su Bosnu i Hercegovinu predstavljale sportašice iz Let's Dance Nevesinje Aleksandra Vučković i Tamara Lojpur. U izuzetno jakoj konkurenciji u juniorskom uzrastu osvojile su 9 mjesto.

Božićni Cheerleading Izazov u organizaciji Sportskog cheerleading kluba Ljubuški održan je 19.12.2024. Na već tradicionalnom natjecanju koje se nekoliko godina održava u Ljubuškom sudjelovalo je 150 sportašica iz 5 klubova. U kadetskom uzrastu zlato je pripalo klubu domaćinu Sportskom cheerleading klubu Ljubuški, dok je titula prvaka juniorskog uzrasta pripala Hrvatskom cheerleading klubu Široki. Kulturni Centar Ljubuški je bio malen za ovaj događaj, jer nažalost svi zainteresirani nisu mogu ući i gledati natjecanje. Upravo zbog svoje atraktivnosti i masovnosti ovaj događaj je uvršten u program Adventa u Ljubuškom po prvi put. Domaćini su za sve sudionice pripremili i Božićne poklone.



BIH TEAM

KOŠARKAŠKA REPREZENTACIJA NA PUTU ZA EUROBASKET 2025!



Košarkaška reprezentacija Bosne i Hercegovine je uvjerljivom pobjedom nad selekcijom Hrvatske u prepunoj sarajevskoj Skenderiji ostvarila važan korak do plasmana na Evropsko prvenstvo.

Olimpijski komitet Bosne i Hercegovine upućuje iskrene čestitke Reprezentaciji i Košarkaškom savezu BiH na izuzetnoj pobjedi!

Kvalifikacije se nastavljaju u februaru 2025. godine, kada će BiH ugostiti Kipar. Pobjeda u tom susretu donijela bi našoj

selekciji korak bliže plasmanu na Eurobasket. Istovremeno, kvalifikacije će zavisiti i od rezultata utakmice Hrvatske i Francuske – poraz Hrvatske u tom duelu automatski bi osigurao BiH mjesto na prvenstvu. Sretno #BIHTeam!

FOTO: Klix.ba

NAJVEĆI USPJEH ŽENSKE U18 HOKEJAŠKE REPREZENTACIJE BIH OSTVAREN U SARAJEVU

Ženska U18 hokejaška reprezentacija Bosne i Hercegovine ostvarila je jedan od najvećih uspjeha bh. hokeja na turniru u Sarajevu, pobijedivši sve tri favorizovane ekipe iz regije.

Domaći teren donio je našim djevojkama posebnu motivaciju, što je rezultiralo pobjedama protiv Hrvatske (5:2), Srbije (5:2) i Slovenije (5:3).

Posebno je značajna pobjeda nad Slovenijom, glavnim favoritom turnira. Bh. hokejašice pokazale su nevjerovatnu borbenost i kvalitet, preokrenuvši rezultat u svoju korist u napetoj završnici, čime su potvrdile svoj talenat i timsku snagu. Ovo je značajan uspjeh za bh. ženski hokej, s obzirom na ograničene resurse i infrastrukturu. Predstojeći turniri bit će prilika da naše igrice nastave u istom ritmu i osiguraju nove pobjede za Bosnu i Hercegovinu.



Čestitamo našim reprezentativkama, trenerima i Hokejaškom savezu BiH, te im želimo puno uspjeha na narednim turnirima!

MUHAMED ĐONKO SREBRENI NA U21 EVROPSKOM TAEKWONDO PRVENSTVU



Na Evropskom seniorskom U21 taekwondo prvenstvu, održanom u Sarajevu, bosanskohercegovački reprezentativac Muhamed Đonko je u kategoriji do 68 kilograma osvojio srebrnu medalju.

Đonkovo srebro bilo je drugo odličje za Bosnu i Hercegovinu na Evropskom prvenstvu, nakon što se drugog takmičarskog dana Ada Avdagić okitila bronзанom medaljom u konkurenciji do 53 kilograma. Čestitke osvajačima medalja, trenerima i Taekwondo savezu BiH!

ADA AVDAGIĆ OSVOJILA PRVU MEDALJU ZA BIH NA EVROPSKOM SENIORSKOM U21 PRVENSTVU



Prvu medalju na Evropskom seniorskom U21 prvenstvu Bosni i Hercegovini donijela je Ada Avdagić. Reprezentativka naše zemlje osvojila je bronзанu medalju u kategoriji do 53 kilograma.

Na Prvenstvu koje je održano od 21. do 23. novembra učestvovalo 567 takmičara iz 43 države, kao i Svjetski taekwondo izbjeglički tim.

Po okončanju Evropskog seniorskog U21 taekwondo prvenstva, u periodu 24. i 25. novembra, takođe u Areni Hills, održao se i Bosnia Open G1 turnir.

Čestitamo Adi Avdagić, trenerima i Taekwondo savezu BiH.

BENJAMIN HUSIĆ NA FINALNOM GRAND PRIX OSVOJIO ZLATO I LASKAVU TITULU



U decembru mjesecu u Bukureštu je održan evropski taekwondo Grand Prix final za taekwondoiste kadetskog i juniorskog uzrasta, a posljednji takmičarski dan obilježila je zlatna medalja 17-godišnjeg Benjamina Husića.

Reprezentativac Bosne i Hercegovine trijumfovao je u kategoriji do 73 kilograma, u konkurenciji 16 takmičara.

Husić je trijumfom na Grand Prix potvrdio da se nalazi u odličnoj formi nakon što je na prethodno održanom turniru Bosnia Open E1/G1 osvojio srebrnu medalju. Do zlatne medalje Benjamin Husić je stigao pobjedom nad Amerikancem Victorom Rodriguesom.

Dodatno priznanje za mlađeg brata bh. olimpijca Nedžada Husića je i nagrada za najboljeg juniora finalnog Grand Prix-a.

JOVAN LEKIĆ POSTIGAO DRUGI NAJBOLJI REZULTAT U HISTORIJI LUISSIANA STATE UNIVERSITY-A!

BiH plivač, olimpijac Jovan Lekić, ostvario je na međuuniverzitetском takmičenju održanom na bazenima Gabrielsen Natatorium na Univerzitetu Georgia, ostvarivši drugi najbolji rezultat u historiji Louisiana State University (LSU).

Jovan je u disciplini 1650 yardi plivao fantastičnih 14:50.90, što mu je donijelo 875 FINA bodova. Čestitke Jovanu na ostvarenom uspjehu, trenerima i Plivačkom savezu BiH!



EU PROJEKTI

PODGORICA | KONFERENCIJA WOMEN4SPORT



U okviru Erasmus+ projekta Women4Sport, koji se fokusira na postizanje rodne ravnopravnosti u vodstvu i donošenju odluka unutar nacionalnih olimpijskih komiteta zemalja Zapadnog Balkana, 15. novembra održana je konferencija u Podgorici, Crna Gora.

Crnogorske sportistkinje ostvarile su značajne uspjehe na međunarodnoj sceni, ali ravnopravnost u sportu još nije dostignuta, naročito ne u zastupljenosti žena u upravljačkim strukturama sportskih organizacija, poruka je sa

Konferencije Women4Sport, koju je organizovao COK, kao dio projekta sufinansiranog od strane Evropske unije kroz Erasmus+ program.

Nakon uvodnih obraćanja predsjednika Crnogorskog olimpijskog komiteta, Dušana Simonovića i zamjenice generalnog sekretara Maje Peković, održana su dva panela. Na prvom, posvećenom ulozi žena u upravljačkim strukturama sportskih organizacija u Crnoj Gori, govorile su: Jelena Dubljević, predsjednica Košarkaškog saveza Crne Gore, Zorica Kostić Vučićević, predsjednica Ragbi saveza Crne Gore, i Ksenija Božović, direktorica ženskih reprezentativnih selekcija u Odbojkaškom savezu Crne Gore.



Drugi panel bio je posvećen statusu sportistkinja u Crnoj Gori, sa posebnim osvrtom na tranziciju iz sportske karijere u druge profesionalne sfere nakon završetka takmičarske karijere.

Panelistice su bile Sonja Barjaktarović, bivša golmanica rukometne reprezentacije i sadašnja trenerica golmaniki, Anđela Bulatović, bivša rukometašica, sada rukometna trenerica, koja je zajedno sa Sonjom bila dio generacije koja je Crnoj Gori donijela prvu olimpijsku medalju i Ana Milačić, takođe bivša rukometašica, koja sada radi kao savjetnica u Ministarstvu sporta i mladih i Danijela Franeta, selektorica plivačke reprezentacije Crne Gore.

Uspjehu Konferencije doprinijela je i publika, koja je aktivno učestvovala u diskusiji i donošenju zaključka da Crna Gora može biti lider na Zapadnom Balkanu u stvaranju ravnopravnog sportskog sistema, kao ključa za unapređenje rezultata.

KONFERENCIJA “OSNAŽIVANJE DIJALOGA, UNAPREĐENJE UTICAJA” U OKVIRU EU PROJEKTA WOMEN4SPORT



Hrvatski olimpijski odbor bio je domaćin četvrte konferencije pod nazivom “Osnaživanje dijaloga, unapređenje uticaja”, organizirane u sklopu EU projekta Women4Sport. Događaj je otvoren konferencijom za medije, ističući ključne ciljeve projekta koji se odnose na unapređenje rodne ravnopravnosti i povećanje uključenosti žena u sport.

Program je sadržavao i dvije panel diskusije, na teme „Uspjeh u sportu vs uspjeh u profesiji – Kako balansirati karijeru i sport? Inspirativne priče žena koje su uspjele u obje sfere“ i „Sport kao cjeloživotni izbor“.

Projekt podržava Europska unija, a partneri su: Verlab institut, BRAVO, Olimpijski komiteti Crne Gore, Slovenije i Albanije, Hrvatski olimpijski odbor, dok je koordinator Olimpijski komitet BiH.

Zajedno gradimo ravnopravniji sportski svijet!

OCEAN | KLIMATSKE PROMJENE – DA LI SMO ZAISTA SA(S)VJESNI?



Studenti Univerziteta u Travniku imali su priliku prisustvovati inspirativnom predavanju doc. dr. Maje Đurić o utjecaju klimatskih promjena na naš svakodnevni život.

Kroz zanimljive primjere i interaktivni dijalog, dr. Đurić je ukazala na navike koje nas nesvjesno ugrožavaju i istaknula kako male promjene u svakodnevnom životu mogu biti korak ka boljoj budućnosti za sve nas.

Ova predavanja, organizirana širom #EU u sklopu OCEAN projekta, posebno su prilagođena mladima, s ciljem podizanja svijesti o zaštiti naše planete i važnosti kolektivne akcije. Budi dio promjene – počni već danas!

VALUES OF SPORT: BUILDING BRIDGES IN UNITED EUROPE

U Prištini je održana završna konferencija Erasmus+ projekta Sports as Value, koji je okupio partnere iz 7 organizacija iz zemalja EU i Zapadnog Balkana. Projekat, koordiniran od strane švedske organizacije ENGSO, čiji je cilj bio integracija pozitivnih sportskih vrijednosti u svakodnevni život i jačanje zajednica kroz sport.

Na događaju, koji je bio dio 7. Evropske sportske platforme, predstavljeni su rezultati dvogodišnjeg rada, te podaci o percepciji vrijednosti sporta u zemljama Zapadnog Balkana.

Ključne teme uključivale su:

- Podizanje svijesti o važnosti sportskih vrijednosti
- Promociju evropskih vrijednosti kroz sport
- Jačanje saradnje među zemljama
- Prevencija govora mržnje u i kroz sport
- Važnost statističkih podataka i kako ih iskoristiti

Moderatorica događaja bila je dr. Maja Đurić, EU projektna ekspertica OK BiH.

Sport je moćan alat za izgradnju aktivnih, zdravih i mirnih zajednica. Kroz ovaj projekat otvoren je prostor za značajne diskusije i umrežavanje, uz promicanje olimpijskih vrijednosti kao temelja zdravog načina života.





INTERVJU

ISMAIL Barlov

“SVAKI MOJ USPJEH PRIPADA I ISMAILU ZULFIĆU.”

OK BiH: *Ismaile, još jednom ti čestitamo na istorijskoj srebrenoj medalji sa Paraolimpijskih igara u Parizu. Kako se osjećaš sada kada su se slegli utisci?*

ISMAIL BARLOV: Hvala na čestitkama posebno mi znače jer stižu iz krovne bh. sportske institucije Olimpijskog komiteta Bosne i Hercegovine. Teško je reći da su se utisci slegli. Nekad mislim da još uvijek nisam svjestan šta sam zaista napravio, ali trudim se ostati čvrsto na zemlji. Vjerujem da nisam nikada podlegao euforiji, ali sreća je nemjerljiva.

Pariz 2024. godine je nešto što ću pamtiti vječno. Prošlo je nekoliko mjeseci, ali još uvijek mi prolaze slike, svi neki lijepi detalji. Bilo je i straha i treme i nervoze, ali na kraju pamtiti se samo trenutak kada sam zaustavio vrijeme za veliko srebro.

OK BiH: *Kako si doživio trenutak razmjene plivačkih kapa sa olimpijskim prvakom iz Brazila?*

ISMAIL BARLOV: Jedan simboličan, ali jako značajan i upečatljiv trenutak za mene. To je nešto što svako ko se bavi sportom negdje u sebi mašta i nada se da će jednoga dana doživjeti. Kapa koju sam dobio zauzima posebno mjesto u mojim vitrinama. Lijepa uspomena i svakako jedna vrsta motivacije za budućnost.

OK BiH: *Koji su primarni planovi za narednu godinu, posebno u pogledu takmičenja na svjetskim serijama?*

ISMAIL BARLOV: Planiram nastupiti na tri mitinga svjetske serije - Linjano Italija, Barcelona Španija i Berlin Njemačka. Target takmičenje je nastup na seniorskom Svjetskom prvenstvu u Singapuru naredne godine.

Nakon uspješne godine koju ispraćamo svakako da smo ljestvicu za svako naredno takmičenje podigli visoko. Očekivanja su svakako visoka i od javnosti, a njihova podrška meni je obaveza da ih pokušam ponovo obradovati. Koliko ću u tome uspjeti vrijeme će pokazati, ali ono što mogu obećati je da ću kao i svaki put dati svoj maksimum nastupajući pod zastavom domovine Bosne i Hercegovine. Trudiću se da još jednom učinim ponosnim sve ljude koji me bodre, podržavaju i navijaju za mene.



OK BiH: *Kakvu podršku dobijaš od prijatelja, posebno Ismaila Zulfića i kako to utiče na tvoje uspjehe?*

ISMAIL BARLOV: Podrška prijatelja je snaga koja je neophodna svakom sportisti. Čestitke prijatelja raduju najviše. Oni su mi vjetar u leđa i sigurno je da danas ne bih bio tu gdje jesam da nije bilo i njih. Ismail Zulfić je prijatelj, drug, brat... Dovoljno je reći Zulfa i sve je odmah lakše i bolje. Svaki moj uspjeh je i njegov. Želim jednoga dana da zajedno osvojimo medalju na Paraolimpijskim igrama. Neka to bude Los Anđeles.

OK BiH: *Koje su tvoje najveće želje i ciljevi u sportu u budućnosti?*

ISMAIL BARLOV: Zlatna medalja na Paraolimpijskim igrama. To je san, to je želja, to je cilj. Nekada je zvučalo nemoguće, a u Parizu se pokazalo da su snovi mogući. Moj trener Amel Kapo zna reći "pazi

šta sanjaš možda ti se ostvari". Ja sam sanjao i ostvarilo se, i dalje sanjam i ostvariće se... Naravno svjestan sam da nije lako ni ponoviti Pariz, a još teže otići stepenicu iznad, ali sa radom, trudom i željom ništa nije nemoguće.



OK BiH: *Tvoja poruka mladim u Bosni i Hercegovini...*

ISMAIL BARLOV: Mladi ljudi danas često žele preko noći i na lagan način postići nešto veliko. Uspjeh je sladak samo ako je u njega uloženo mnogo truda. Mnogi lako odustaju i prepuštaju se situaciji. Moja poruka svima koji nešto zaista i iskreno žele je da se nikada ne predaju. Put do vrha je uvijek dug, traje, ali do cilja stižu samo oni najuporniji i ustrajni. Nikad ne odustajte.

OK BiH: *Ismaile, hvala ti na izdvojenom vremenu. Želimo ti mnogo uspjeha u nastavku karijere, da ostvariš ciljeve i snove i da se zajedno radujemo tvojim uspjesima!*



ZAVIRITE U DRUŠTVENE MREŽE OK BiH (klikom na sliku)



Pratite nas na društvenim mrežama:
(klikom na ikone)



©2024. Olimpijski komitet Bosne i Hercegovine.
Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.

